

四庫全書薈要

• 乾隆御覽本

集部

臨川文集卷八十五

宋 王安石 撰

祭文

祭曾魯公文

祭范潁州文

祭周幾道文

祭張左丞文

祭高樞密文

羣牧司祭高公文

祭呂侍讀文

祭馬龍圖文

祭曾博士易占文

祭蘇虞部文

祭李省副文

祭高師雄主簿文

祭馬玘大夫文

祭盛侍郎文

祭杜待制文

祭丁元珍學士文

祭刁景純學士文

祭韓欽聖學士文

祭沈文通文

祭杜慶州杞文

祭曾魯公文

肅肅魯公為時臣宗小大具宜濟以勤恭實相累朝有
德有庸帝序之爵三公是秩神介之祉乃終有吉顯允
嗣子能匹公休贊我事樞符帝之求公榮在家祿養具
美既壽且康順以卒齒公則無憾以返其真天子震悼
逮及國人況如安石辱知最久西望涕頤以薦食酒

祭范潁州文

仲淹

嗚呼我公一世之師由初迄終名節無疵明肅之盛身
危志殖瑤華失位又隨以斥治功亟聞尹帝之都閉姦

興良稚子歌呼赫赫之公萬首俯趨獨繩其私以走江湖士爭留公蹈禍不慄有危其辭謁與俱出風俗之衰駭正怡邪蹇蹇我初人以疑嗟力行不回慕者興起儒先酋酋以節相侈公之在貶愈勇為忠稽前引古誼不營躬外更三州施有餘澤如醺河江以灌尋尺宿賊自解不以刑加猾盜涵仁終老無邪講藝弦歌慕來千里溝川障澤田桑有喜戎孽剽狂敢齟我疆鑄印刻符公屏一方取將於伍後常名顯收士至佐維邦之彥聲之

所加虜不敢瀕以其餘威走敵完鄰昔也始至瘡痍滿
道藥之養之內外完好既其無為飲酒笑歌百城晏眠
吏士委蛇上嘉曰材以副樞密稽首辭讓至于六七遂
參宰相釐我典常扶賢贊傑亂穴除荒官更于朝士變
於鄉百治具修偷墮勉強彼闕不遂歸侍帝側卒屏于
外身屯道塞謂宜耆老尚有以為神乎孰忍使至於斯
蓋公之才猶不盡試肆其經綸功孰與計自公之貴既
庫逾空和其色辭傲訐以容化于婦妾不靡珠玉翼翼

公子弊綈惡粟閔死憐窮惟是之奢孤女以嫁男成厥
家孰堙于深孰鍤乎厚其傳其詳以法永久碩人今亡
邦國之憂矧鄙不肖辱公知尤承凶萬里不往而留涕
哭馳辭以贊醪羞

祭周幾道文

初我見君皆童而憤意氣豪悍崩山決澤弱冠相視隱
憂困窮貌則侔年心顏如翁俛仰悲歡超然一世皓髮
黧面分當先弊孰知君子赴我稱孤發封涕洟舉屋驚

呼行與世乖惟君繾綣弔禍問疾書猶在眼序銘於石
以報德音設辭雖褊義不愧心君實愛我祭其知歆

祭張左丞文

荅谷

嗚呼公作昇州先君實佐公為其子請昏于我先君不
幸公覲京師訃逮公門公哭殊悲弔問賻祭使來以時
乃今公薨獨以窶故財無以祔缺無以缺祭又不時獨
悲以慕惟公之生明惠裕和善恕於人恩實我多雖祭
不時其吐之乎

祭高樞密文

越初生民降訖于茲廢興亂治成敗安危猷為之君辯
論之師章書傳記箴賦銘詩乖離詭駁有萬其辭公於
其間靡所不知江含海畜其富無訾孰窮其源孰究其
涯作時宗工出長羣司洋洋厥聞可以敷施謂且永年
左右諏咨曷云其凶弗耄弗期凡我常僚曷已其思為
此薄物以將我悲

羣牧司祭高公文

嗚呼惟公學問文章丘山鬱鬱湖海茫茫弼我密命作
刑四方寅恭淑慎天子所臧駉駉之良兵賴以盛公用
勤告遂圖厥政某等在職維公之依孰奪以逝邈乎不
歸殯引就行有翩其旂來陳薄物以告長違

祭呂侍讀文

嗚呼伯夷相唐尚父賓周受氏昨國重光奕休于辰之
逢發我文靖公實冢嗣續前之慶御書翰林典禮太常
是為世臣焜耀家邦方騫方奮厥隕誰使震驚咨嗟上

自天子凡居此列惟公弟僚於公之殯祇薦羞醪

祭馬龍圖文

嗚呼余託業於進士熟君名於垂髫既備官於淮南習
為縣之風謠去幕府而西遊依國門之嶢嶢始逢君之
執戟屢顧我而回鑣逮揚子之既見方皖城之窮漂遂
有通家之好終無挾長之驕君言事以止出子罷官而
南僑一江亭之邂逅話宿昔以終宵以牧官之在列當
御史之還朝又追隨於暇日心所好而忘遙距乖隔之

幾何忽水淺而風飄畫半塗於萬里棄餘日於一朝維
知君之日久信智邁而才超考前人之治亂講後世之
昏昭釋衆言之牴牾排異學之傾搖衆相紛以異緒君
獨悟而同條嗟墁人之已矣斤欲奮而誰要想明靈之
猶在冀薄禮之能招

祭曾博士易占文

嗚呼公以罪廢實以不幸卒因以天亦惟其命命與才
違人實知之名之不幸知者為誰公之間里宗親黨友

知公之名於實無有嗚呼公初公志如何孰云不諧而
厄孔多地大天穹有時而毀星日脫敗山傾谷圯人居
其間萬物一偏固有窮通世數之然至其壽夭尚何憂
喜要之百年一蜨以死方其生時窘若囚拘其死以歸
混合空虛以生易死死者不祈唯其不見生者之悲公
今有子能隆公後惟彼生者可無甚悼嗟理則然其情
難忘哭泣馳辭往侑奠觴

祭蘇虞部文

君慎足以保其身和足以諧於世嗟乎不淑而不永年
受命徂東纔三年耳孰云今者君以喪歸交游之情哀
痛何極聊陳薄奠以告長違

祭李省副文

壽朋

嗚呼君謂死者必先氣索而神零孰謂君氣足以薄雲
漢兮神昭晰乎日星而忽隕背乎不能保百年之康寧
惟君別我往祠太一笑言從容愈於平日既至即事升
降孔秩歸鞍在塗不返其室訃聞士夫環視太息矧我

於君情何可極具茲醪羞以告哀惻尚饗

祭高師雄主簿文

我始寄此與君往還於時康定慶歷之間愛我勤我急
我所難日月一世疾於跳丸南北幾時相見悲歡去歲
憂除追尋陳迹淮水之上治城之側握手笑語有如一
昔屈指數日待君歸艤安知彌年乃見哭庭維君家行
可謂修飭如其智能亦豈多得垂老一命終於遠域豈
唯故人所為歎惜撫棺一奠以告心惻尚饗

祭馬玘大夫文

嗚呼惟君才敏強明為時能吏剴劇撿煩易於屈指近
畏遠懷有譽無訾使于嶺南俗易夷鄙江東內遷厥勢
方起孰云一朝壽止如此攄懷以辭薦此薄菲

祭盛侍郎文

某聞之行義弗高位與年尊慙者則已行義既高位與
年下憾者則人在已無慙在人無憾有若公然其又奚
言惟昔先人捐我諸孤實在公藩公泣然哀穉死賻存

託殯得宮寓處得廬一出公恩公或我臨不有其尊我
獎我矜均其子孫戴德莫酬誰謂我去公三年間不
再行豈曰怠忘賤不敢煩補官揚州公得謝歸曾幾何
時訃者來門哭泣作書以弔後昆欲醊棺前縻不可奔
會有吏役盡室而南戢恨含慙轉移寒暄乃今來歸公
喪且暮纔命使人薄進頻繁嗟嗟公恩死其敢援

祭杜待制文

士恥無材恥不修身身修而材有不及民凡世可願於

公皆有孰窘其年不使難老貴者善防其有孰窺公心
豁豁不置牆惟有挾易驕不難拒善公義所在服之無
賤推以時施宜以每成又況於公強果以行物貴於時常
以其少悲矣予思我知其久鍾山北蟠江洛而東完厚
密牢萬世之宮其歸孰知愚與在此酌公以文以配銘
史

祭丁元珍學士文

我初閉門屈首書詩一出涉世茫無所知援挈覆護免

於貼危雖培浸灌使有華滋微吾元珍我始弗殖如何
棄我隕命一昔以忠出恕以信行仁至於白首困厄窮
屯又從躋之使以躓死豈伊人尤天實為此有槃彼石
可誌於丘雖不屬我我其徂求請著君德銘之九幽以
馳我哀不在醪羞

祭刁景純學士文

嗚呼刁公不忤不求坦然立行之平裕然與人之周既
貴賤以同觀亦始終之相侔惟其動必依於仁故其壽

若此之脩望音容而已遠欲親弔以無由慨臨風而出涕
辭以侑乎醪羞

祭韓欽聖學士文

嗟為君兮邦之特目揚秀兮顏髮澤紛百家兮並涉超
獨懷兮道德博蕩蕩兮無畛寬恂恂兮莫逆出當官兮
發論使權彊兮業息年何尤兮止此祿不多兮誰嗇具
壺觴兮酌哭攀喪車兮啟夕豈獨愁兮吾僚隱多聞兮
諒直顧笑語兮已矣冀來嘉兮寬鬼

祭沈文通文

嗚呼文通一世之英耀矣其光韡矣其榮有所不為為
無不果有所不學學無不成故治行簡於人主之心名
聲溢於時士之口謂且復起謀謨左右何與之以如此
之才而不副之以須臾之壽悲傷歎息舉世皆然豈特
故人為之流連馳哀一酌以訣終天

祭杜慶州杞文

嗚呼慶州一世之英濯濯其靈粲粲其明材能稱於天

下言行信於朝廷孰多其子而不足以齡不肖之身始
佐公揚公後來東有賜於明昔飲同堂今奠於庭酒肴
則薄豐者維誠再拜事公敢不如生

臨川文集卷八十五

臨川文集卷八十六

宋 王安石 撰

祭文

祭吳侍中沖卿文

祭歐陽文忠公文

祭張安國檢正文

祭李審言文

祭沈中舍文

祭東向元道文

祭陳浚宣叔文

祭王回深甫文

祭刁博士繹文

祭虞靖之文

祭北山元長老文

祭呂望之母郡太文

祭程相公琳文

祭秦國夫人文

祭鮑君永泰王文二

祈雨文

謝雨文

哀辭

李通叔哀辭

泰興令周孝先哀辭

祭吳侍中冲卿文

嗚呼公命在酉長我一時公先我出我後公萎中間仕
宦有合有離後我所踐公輒仍之出則交轡處則連櫟
坐肘則並行肩則差豈願敢及天實我貽公之停蓄及
所設施有誥有誄亦有銘詩又將有史傳所不疑我既
憊眊何辭能為婚姻之故唯以告悲

祭歐陽文忠公文

夫事有人力之可致猶不可期況乎天理之溟漠又安
可得而推惟公生有聞于當時死有傳於後世苟能如

此足矣而亦又何悲如公器質之深厚智識之高遠而
輔學術之精微故充於文章見於議論豪健俊偉怪巧
瑰琦其積於中者浩如江河之停蓄其發於外者爛如
日星之光輝其清音幽韻淒如飄風急雨之驟至其雄
辭閎辯快如輕車駿馬之奔馳世之學者無問乎識與
不識而讀其文則其人可知嗚呼自公仕宦四十年上
下往復感世路之崎嶇雖屯遭困躓竄斥流離而終不
可掩者以其公議之是非既壓復起遂顯于世果敢之

氣剛正之節至晚而不衰方仁宗皇帝臨朝之末年顧
念後事謂如公者可寄以社稷之安危及夫發謀決策
從容指顧立定大計謂千載而一時功名成就不居而
去其出處進退又庶乎英魄靈氣不隨異物腐散而長
在乎箕山之側與潁水之湄然天下之無賢不肖且猶
為涕泣而歔歔而況朝士大夫平昔游從又予心之所
嚮慕而瞻依嗚呼盛衰興廢之理自古如此而臨風想
望不能忘情者念公之不可復見而其誰與歸

祭張安國檢正文

嗚呼善之不必福其已久矣豈今於君始悼歎其如此
自君喪除知必顧予怪久不至豈其病歟今也君弟哭
而來赴天不姑釋一士以為予助何生之艱而死之遽
君始從我與吾兒游言動視聽正而不偷樂於饑寒惟
道之謀既掾司法議爭讞失中書大理再為君屈遂升
宰屬能撓彊屈辯正獄訟又常精出豈君刑名為獨窮
深直諒明清靡所不任人忪莫知乃惻我心君仁至矣

勇施而忘己君孝至矣孺慕以至死能人所難可謂君子嗚呼吾兒逝矣君又隨之我留在世其與幾時酒食之哀侑以言辭

祭李審言文

嗚呼噫公之才豈獨我知公數困厄豈人能為所畸乎人豈能無疵所侔乎天我乃知之交不就利高明所忌泣不失宜孤寡所思凡今君子疚實在茲公亦如我如我公知厥交淡如唯正無私哀今亡矣侑醢以辭

祭沈中舍文

惟公之生于朝搢紳夫人殯之以作封君皆以壽終而
世有人昔我先子公倫之舊施于不肖遂為世友不腆
之文既藏于丘惟是區區以贊醪羞

祭東向元道文

嗚呼東君其信然耶奚仇友朋奚怨室家堂堂去之我
始疑嗟惟昔見君田子之自我欲疾走哭諸田氏吾靡
不赴田疾不知今乃獨哭誰同我悲始君求仕士莫敢

匹洪洪其聲碩碩其實霜落之林豪鷹鸞萬鳥避逃
直摩蒼天躡焉僅仕后愈以困洗藏銷塞動輒失分如
羈駿馬以駕柴車側身墮首與蹇同芻命又不祥不能
中壽百不一出孰知其有能知君者世孰予多學則同
游仕則同科出作揚官君實其鄉傾心倒肝迹斥形忘
君於壽食我飲鄞水豈無此朋念不去彼既來自東乃
臨君喪悶悶陰宮梗野榛荒東門之行不幾日月孰云
於今萬世之別嗟屯怨窮閔命不長世人皆然君子則

亡予其何言君尚有知具此酒食以陳我悲

祭陳浚宣叔文

嗟乎宣叔學以為已不溺於俗孤騫介峙孰以不羸孰
忤不强卒躋窮已乃命不祥怡怡在宮翼翼在外胡是
不福貴姦壽悖我思古人祿世其初悲君之食不逮於
孤古不肯死隆親急故今此營營誰瞻誰助自昔海濱
以心相投俱官於南邂逅綢繆顏合意同云誰無友諒
直之好於君實厚有志不施又困無財雖痛何為維以

告哀

祭王回深甫文

嗟嗟深甫真棄我而先乎孰謂深甫之壯以死而吾可
以長年乎雖吾昔日執子之手歸言子之所為實受命
于吾母曰如此人乃與為友吾母知子過於子初終子
成德多吾不如嗚呼天乎既喪吾母又奪吾友雖不即
死吾何能久搏胷一慟心摧志朽泣涕為文以薦食酒
嗟嗟深甫子尚知否

祭刁博士繹文

惟君其先黻冕之華君弱而良遂世其家越天聖初上
始即位開延聞人間不容偽若古堯虞稷契親逢君子
其時奮追羣龍五兩之綸三鍾之粟沈才下吏間關楚
蜀竭來揚州輔佐元侯朝其或者明試謨謀最未及論
泯焉之幽龜紫紛如朱丹其車昔之同升泰亦衆已胡
寧若人乃此乎止旻天介壽宜良者多良者弗壽謂旻
天何親髮墮顛子髮猶羈惟堂一慟誰者無悲令龜得

日棺還無咎銘旌悠悠羽翬南首惟君之舊惟僚及友
徘徊路旁涕落莫觴

祭虞靖之文

剛耿直諒醇明博美敢於為義我實知子達我所願窮
吾所恥柰何終窮命也天只前年僕馬來自田里白顛
夷馘相見悲喜輸吾肝膈莫逆其違衰老邂逅綢繆山
水念我難繼庶今少止翻然為辭遂隔生死寓哀一酹
嗚呼已矣

祭北山元老文

元豐三年九月四日祭于北山長老覺海大師之靈自
我壯強與公周旋今皆老矣公棄而先逝孰云遠大方
現前饌陳告違世禮則然尚饗

祭呂望之母郡太文

嗚呼賢矣夫人善持門閭皓若玉雪一其終初允孝維
婦允仁維姑實生才子我所歎譽秉義率法困而不渝
夫人之教著不可誣歸殯窆安無悔無愉維予之故具

此俎壺

祭程相公琳文

為高若訥作

嗚呼公在京師為天子毗發論彊彊不苟其為公於四方為鎮為屏推良抑姦兩適寬猛自伯休父有稱于周及公千年追配前休時文而文時武而武顧我無狀辱公等件庶見吉召乃聞凶歸馳哀一觴終古之違

祭秦國夫人文

為高若訥作

於惟夫人順慎和恭上之岐岐實護于中開號大邦福

祿之隆康寧壽考而以榮終喪車其行肇此明發上用
舊德情之鬱結凡我在位敢忘心怛莫云將之具此薄
物

祭鮑君永泰王文

年月日官某敢告于鮑君之神農之勞神之所知也歲
之四時而於冬為最隙然猶築場圃治屋廬塗困倉糞
田疇未嘗一日而晏然以休息今茲令又以其暇時屬
之使治渠川比常歲則農之勞蓋有加焉神宜哀憐而

有以相之也治之無幾也而雨雨且止丁壯老弱相與
行水而涸之猶未也而又雨非民獨病也而令亦夙夜
以憂惟神相之以霽令是役早有卒也夫令之所以憂
其職民也惟神之食於民也為已久而憂之亦不可在
令後也謹告

二

年月日敢再告于鮑君之神謁於神之明日而天地廓
然以溫民賴以供役且卒事而復雨雨淫不止民愁而

令恐意者令之治行無有可媚于神者而神不卒聽之
乎令則有罪而民何尤且霜雪風雨之濫淫固其責自
神而無與於令也巍然南面饗人之歸事已而利澤不
加焉亦神羞也惟神降意以從令之言毋忽令亦能發
明神之令德使民世事神不懈而有加焉謹告

祈雨文

惟神美名正氣索之前史詳矣噫昔人也挺王臣之節
忠信我任德誼我負故時君倚焉今其神也享廟食之

貴陰陽吾職禍福吾柄故州民賴焉今千里旱暵及時
不雨農夫悼心郡將失色某遂躬率僚屬來請于大廡
下惟神全死生之大名開聰明于一方霈甘露以足民
食則前謂人神之靈於古今無愧焉尚饗

謝雨文

夫廟其貌神其靈函聰明正直之德俾禍福倚伏之時
用默於民而不知其所以用者斯之謂至神乎太守領
天子命藩一都會歲時豐凶疾苦得勞佚之使百姓無

愁歎之聲斯太守之事也神陰也陰陽契合若影響然
邇以郊原旱暵及夏不雨耘耔者悼心自失遂祈福
于大廡下惟神惻然開明靈惠然納至誠言然而雲興
禱然而雨零苗枯而生民默而聲又得非神之至乎今
吏民潔牲醴奔走歡呼請償其靈某不佞輒書為千古
世諺尚饗

李通叔哀辭

并序

通叔李不疑世為閩民通叔再從太學進士試斥不送

自京師歸面其親道建溪溪水暴下反其身溺死年二十八云初予既孤寄金陵家焉從二兄入學為諸生常感古人汲汲於友以相鐫切以入於道德予材性生古人下學又不能力又不得友以相鐫切以入於道德予其或者歸為塗之人而已邪為此憂懼既而遇通叔於諸生間望其容而色睟然類君子即而與之言皆君子之言也其容色在目其言在耳則予放心不求而歸邪氣不伐而自遁去求其所為文則一本於古華虛蕩肆

之學蓋未嘗接於其心誠有以開予者予得而友之憂
懼釋然作太阿詩貽之道氣類之同而合也通叔亦作
雙松詩道氣類之同而期之久也以爲報自予之得通
叔然後知聖人戶庭可策而入也是不惟喻於其言而
已蓋觀其行而得焉者爲多其再斥於太學而歸也予
待禮部試留京師別且言曰通叔去而歸某也不沒而
入於愚也其幾矣明年亦斥而歸或得官皆宜在淮江
之南某也不可以之閩通叔來若何通叔曰是亦不疑

之言也明年從事淮南將問且召焉則未也或以死狀
訃既慟且疑且幸其不然會有江南之役遇閩人輒問
狀還泊東流尉許程者閩人也乃知訃者信又知陳安
石者亦溺死安石字伯起亦閩人予嘗問通叔素友獨
言伯起云噫二子豈行殆也其亦命而已矣予悲通叔
窮以天也其道之不及民也又悲天之不予相也作哀
辭

我思古人兮維友之求燕處日講兮行相為謀相翼以

進兮相持以脩要歸于道兮不入于尤卒聖若賢兮其
本則然我無以是兮甚懼以憂猗嗟吾子兮畜德挾材
傑然自如兮不羣庸游考講六藝兮造窮微深匪富貴
慕兮匪賤窮羞曰予既逢兮朝夕其旁仁義之光兮忠
信之隙邪志蕩夷兮正氣獨完吾子賜我兮於安以疇
尚曰子興兮羽儀于世吾君德澤此兮淳漓固偷孰神
不悲兮隕子于溪子生適然兮欲誰仇所嗟存者兮志
孤道遼子之不就兮一朝而休死不以所兮誰得子尸

誰祔于棺兮誰坎于丘予欲慟哭兮子豈有聞子不可作兮予生之愁

泰興令周孝先哀辭

吁嗟于思兮孝于父母施於族姁兮亦及朋友云然兮宜不富又曷為兮不壽藐藐兮其子瑯瑯兮其妻無廬與田兮哀者其誰吾無柰何兮哀以吾辭

臨川文集卷八十六

謹案卷八十六第二頁後五行何辭能為刊本何
訛句據宋文鑑改

第十一頁前五行令吏民潔牲醴訛體據別本改





總校官庶吉士臣張能照

校對官檢討臣龔大萬

謄錄監生臣樊少臣

欽定四庫全書薈要

集部

臨川文集卷八十九

七至

詳校官助教臣常循



臨川文集卷八十七

宋 王安石 撰


神道碑

贈司空兼侍中文元賈魏公神道碑

檢校大尉贈侍中正惠馬公神道碑

贈司空兼侍中文元賈魏公神道碑

魏公既薨之明年皇帝篆其墓碑之首曰大儒元老之碑有詔造文賜公子使之并刻臣某昧死序列再拜



稽首以聞曰

公諱昌朝字子明姓賈氏皇祕書省著作佐郎贈太師
中書令尚書令晉國公諱注之子皇太子左贊善大夫
贈太師中書令尚書令齊國公諱璉之孫晉中書舍人
史館修撰皇贈太師中書令魯國公諱緯之曾孫其先
南皮人中徙獲鹿今墓開封而為其縣人者自公皇考
始公少則莊重謹密治經章解句達老師宿學譽歎以
為賢已天禧元年獻文章召試賜同進士出身除常州

晉陵縣主簿國子監說書又以江州德化縣令兼潁川
郡王院伴讀當是時孫宣公領國子一見聽語待以
公相數舉公學問當在人主左右大臣有以親嫌者故
久弗用以知常州宜興開封府東明兩縣監在京廣濟
永濟兩倉又召置國子監說書景祐元年積官至尚書
都官員外郎乃始置崇政殿說書而以公為之公於
傳注訓詁不為曲釋至先王治心守身經理天下之意
指物譬事析毫解縷言則感心自仁宗即位大臣或操

法令斷天下事稽古不至秦漢以上以儒術為疏闊
然上常獨意鄉堯舜三代得公以經開說則慨然皆
以為善而公由此顯矣於是上所質問多道德之要公
請悉記錄歲終歸之太史詔以章獻太后故為彭城郡
王諱其名公言母之諱禮不得以出於宮太平興國寺
災公以易春秋進戒因言近歲屢災寺觀天意蓋有
所在獨可勿繕治以稱陛下畏天威愛人力之意西
域僧以佛骨銅像來獻公請加賜遣還母以所獻示外

上皆從之以直集賢院天章閣侍講史館修撰判尚書
禮部判太府寺天章置侍講自公始故事親祠郊廟燕
遊慢戲之物皆在儀衛公奏除之無幾遂以知制誥龍
圖閣直學士權知通進銀臺司兼門下封駁事權判吏
部流內銓權知開封府又以右諫議大夫權御史中丞
兼判國子監而侍講如初公之為銓也河北蟲旱以公
安撫公舉能誅姦於利害多所興除異時縣令奉錢滿
萬二千乃舉令公以為法如此則小縣終不得善治乃

請槩舉令而與其奉如大縣其在御史劉平為趙元昊
所得邊吏以降敵告議收其族公言漢殺李陵母妻子
陵不歸而漢悔真宗撫王繼忠家後賴其力且平事
固未可知乃不果收侍講林瑀者言天子即位當步
其日占所得卦以知吉凶公奏瑀所言不經不可用上
即為公罷瑀又奏劾駙馬都尉柴恭僖公奪其州人
以為宜初元昊反公言兵事起財不贍宜及今度經費
罷減諸不急至是詔與三司合議一歲所省率緡錢百

萬慶歷二年契丹來求地請婚公主其使責以信義告之利害客誣服不能發口執政議使契丹攻元昊公曰契丹許我而有功則必驕以弱我而責報無窮已不且以我市於元昊矣且唐中極衰時聽吐蕃擊朱泚陸贄尚以為不可後乃知吐蕃陰與泚合而陽言助國今獨安知契丹計不出此乃言所以待夷狄者凡六事上皆行其策三年遂以本官參知政事四年以尚書工部侍郎檢校太傅為樞密使五年以集賢殿大學士同中書

門下平章事兼樞密使居兩月拜昭文館大學士監修國史議祔章惠太后太廟公言其非禮及祔獻懿二后密勅遷文武位一等賜外內諸軍特支優給公又獨奏罷之既而勅遷兩府官公又不從乃已元昊歸石元孫議賜死公爭言自古將帥被執歸多不死元孫以不死七年上以旱避正殿貶食自責公因稽首遜位章六七入乃除武勝軍節度使檢校太傅同中書門下平章事判大名府兼北京留守河北安撫使妖人王則謀舉

大名反河南北使其黨挾書妄言冀得近公公疑為姦
考問具服則惶恐不及會獨嬰貝州以反公即使部將
王信孟元郝質馳兵操攻具往且請自出搏賊不許終
賊所以擒滅功居多移鎮山南東道檢校太師賜爵安
國公公因請寬諸吏民為則所脅者而捕河北妖人治
殺之無所漏河決商胡方暑公暴隄上躬親指畫出倉
廩與被水百姓舍其流棄接以醫藥所活九十餘萬口
契丹誘亡卒號為南軍以戰夏人而邊法卒亡自歸者

死公變其法有歸者故拔擢超其伍於是歸者衆因以知契丹國事契丹亦因拒亡卒黜南軍不用邊人以地外質公請重禁絕主不時贖人得贖而有之地則盡歸邊以不爭皇祐元年徙鄭州從公求也至見留為祥源觀使既而以尚書右僕射觀文殿大學士判尚書都省朝會班宰相視其儀物歲中又求任外除山南東道節度使右僕射檢校太師兼侍中判鄭州固辭僕射侍中乃改同中書門下平章事又欲遷公四子各一官亦以

公辭而止二年母燕國太夫人薨命以故官不起賜書
寵慰從之公事燕國以孝聞上嘗賜銀飾肩輿士大
夫以為榮及薨自鄭歸塋扶舁蒼然肩足皆胠行路瞻
望悲哀歎息四年除故官侍講居頃出治許州將行矣
仁宗問易之乾卦公既講解又作書以亢龍為戒手
詔褒答以公所獻藏太史五年又涖大名安撫河北中
書議塞商胡決以公異論故使建言者專其事公猶爭
不已河果不可塞建言者得罪而澶魏濱棣德博多水

死公乃請使撫巡賑救人用歸息嘉祐元年進封許國公又兼侍中方避未聽而以樞密使召卒罷侍中而以尚中書門下平章事為樞密使三年以鎮安軍節右僕射檢校太師兼侍中充景靈宮使又出許州七年以保平軍節陝州大都督府長史移大名兼安撫公凡三至魏及許鄭皆以寬惠為治人安樂之它將相賜公使錢多使牟利公度所賜為用故在所尤不擾皇帝即位改節度鳳翔加左僕射鳳翔尹進封魏國治平元年求

還使侍中守許州至六七終不許二年乃授許州入見
又辭不許使撫諭須秋乃發六月告疾中人太醫問視
相屬又力求解將相乃以左僕射觀文殿大學士判尚
書都省七月戊寅薨上親臨哭發涕為不聽朝二日
賜龍腦水銀以斂制服出司賓祭弔別賜黃金給葬贈
司空兼侍中謚曰文元以九月甲申葬開封汴陽里晉
公墓次公年六十八散官開府儀同三司勲上柱國號
推誠保德崇仁守正忠亮佐運翊戴功臣邑戶萬五千

實封五千六百公所著書有春秋要論十卷羣經音辨
十卷通紀八十卷本朝時令十二卷又奏議文集各三
十卷元配王氏尚書兵部郎中集賢殿修撰軫之女追
封莒國夫人繼配陳氏武信軍節度使康肅公堯咨之
女封魏國夫人六男子章太常博士集賢校理早卒圭
尚書比部員外郎田尚書駕部員外郎青尚書司門員
外郎齊大理寺丞炎未仕三女子國子博士程嗣弼大
理寺丞宋惠國太常博士龐元英公壻也其後天子

以炎守將作監丞又官公內外族親凡九人賈氏自誼
及耽傳王相帝皆以儒學至公又以經術致將相出入
文武有謀有功當中國治安四夷集附寵祿光大始終
褒榮君臣相遭於是為盛銘曰於皇仁宗時宋之
隆莫此中國四夷來同孰夾孰承有宰魏公帝曰詢爾
羣公卿士朕欲考古以求亂治有博六藝使熙朕志魏
公乃來錫帝之求進于殿中登闡洸幽乃尹開封治民
不隸乃丞御史督制庶无膏澤在下熏丞在上參國政

事遂都將相帝巡大塗公帝之車帝御廣宮之屏之墉
文條武毫具獻膚功終徂在天公則隨邁廷喪元老隱
加問賚有銘太史有謚太常次詩不誣斷石墓旁

初卜葬公汴陽里以水故改卜熙寧元年八月庚
申葬許州陽翟縣三峯鄉支流村奉勅改鄉名
曰大儒村名曰元老里朝散大夫右諫議大夫參
知政事太原郡開國侯食邑一千一百戶賜紫金
魚袋臣王某謹記

檢校太尉贈侍中正惠馬公神道碑

推忠保順同德翊戴功臣彰德軍節度觀察留後特進
檢校太尉使持節相州刺史兼御史大夫上柱國扶風
郡開國公食邑六千六百戶食實封二千二百戶謚曰
正惠馬公以天禧三年十月戊戌塋開封祥符縣某鄉
某里至嘉祐七年公孫慶崇始來請銘以作公碑序曰
馬氏故扶風人至公高祖而徙處雲中贈太師諱某者
於公為曾祖贈太師中書令諱某者於公為祖龍捷左

廂都指揮使江州防禦使贈太師中書令尚書令蔡公
諱某者於公為父蔡公從太祖定天下力戰有功當是
時雲中已為契丹所得故馬氏又徙處浚儀今開封府
祥符也公諱某字子元蔡公之終也年七歲太祖召
見禁中有司言例當補殿直詔特授西頭供奉官而賜
以名開寶五年年十八監彭州兵馬以嚴飭見憚如老
將太平興國三年領兵戍秦州清水姦人李飛雄乘驛
稱詔捕公及秦隴巡檢劉文裕等將擊之秦州因盜庫

兵以反公辨其詐與文裕執飛雄治殺之五年監潭州
兵馬改東頭供奉官雍熙二年又監博州兵馬劉延讓
敗於君子驛而契丹歸矣公方料丁壯集芻糧繕城治
械如寇至吏民初不悅其生事也已而契丹果至度不
可攻乃去四年改西京作坊副使將屯于冀州端拱元
年移知定遠軍時議發河南十三州之民轉饟河北公
告轉運使樊知古此軍聚兵少而積粟多歛其腐尚可
得十七知古用此得粟五十萬斛以罷河南之役事聞

朝廷太宗嘉之二年深州新蹂於契丹城郭廬舍多壞而流民衆乃移公知深州公至數月則壞者完流者復舉州忘其寇戎之故而以公為能撫我會保州不治移往代之淳化二年又移知慶州羌萬人以怨程德元來寇公誘其渠帥諭以威信即皆引去四年遷西京作坊使知梓州五年李順為亂於蜀之西川以公往討又以為先鋒平劔州召還至三泉而復以公與王繼恩討賊繼恩怒公抗直使守彭州盡收其軍而與之羸卒三

百賊率其衆至號十萬公力戰一日亡其卒大半乃夜獨出招救兵復入賊終不能得城而以敗去除成都府兵馬鈴轄遷洛苑使五年除蜀漢九州都巡檢使已而又兼成都府兵馬鈴轄真宗即位改內苑使蜀卒劉旰聚黨數千人為亂所攻數州至輒取之公以卒三百追至蜀州與戰旰走邛州而招安使上官正召公歸成都計事公為正畫曰賊破邛州必乘勝劫掠度江薄我既息而戰我軍雖倍未易敵也不如迎其弊急擊破之

必矣遂行次方井與正合殺旰等無噍類真宗賜書
獎諭賞以錦袍金帶咸平元年加澄州刺史知秦州諸
羌質子有三十年不釋者公悉歸之諸羌德公訖公去
無一人犯塞小泉銀坑久不發掌吏盡產以償歲課而
責之不已公奏得釋而歸其產四年就除西上閤門使
知成都府兼本州兵馬鈐轄有告龍騎士謀為變者所
引以千數公捕殺其首七人而置其餘無所問自乾德
後歲漕蜀物以富人為送吏多坐漂失籍其家公奏擇

三班使臣及三司軍大將代之而課其漕事為賞罰至
今便之六年移鄜延路駐泊兵馬都總管兼知延州蜀
人於公去皆環以泣公至延州羌方以兵覷邊會上元
開門張燈視以無為而羌卒不能為寇又移知鎮州兼
本州兵馬都總管景德元年契丹入邊民入保城公與
之約盜一錢者死有盜錢二百者公即殺之於是自澶
以北城郭皆晝閉詔使過公輒留之而募人間行送詔
皆得其報以聞又以便宜使所至受諸漕輓給邊之物

故契丹欲虜掠無所得車駕次澶州大將王超提卒數十萬逗留不赴公屢趣之不為動移書譙讓乃始出師猶辭以中渡無橋則公先已度材一夕而橋就上聞手詔褒之且知公果可以屬大事也二年移知定州又除東上閤門使樞密院都承旨三年遂以檢校太保簽書樞密院事祥符元年東封泰山以為行宮都總管自此行幸必以公為都總管而皆許之專殺公部分明約束審出入肅然而未嘗輒戮一人於是邊將言契丹近塞

大臣議皆請發兵以備公獨議使邊將移書問狀從之
契丹解去遷檢校太傅四年加宣徽北院使五年除樞
密副使當是時契丹已盟中國無為大臣方言符瑞而
公每不然之獨常從容極言天下雖安不可忘戰去兵
之意及它爭議甚衆真宗多以公言為是七年除潁
州防禦使知潞州州之稅賦常移以輸邊公為論其害
自是所輸不過鄰州而已天禧元年移知大名府兼駐
泊兵馬都總管使中貴人勞問賜白金二千兩居頃之

遂以為宣徽南院使知樞密院事檢校太尉有足疾時
詔內朝別為一班免其蹈舞二年疾病賜告求去位
真宗不許而數使中貴人勞問又幸其第賜白金三千
兩已而度公實病不可強以事乃罷以為彰德軍節度
觀察留後而公固求外鎮終不許居久之稍間入謁
真宗輒使閤門祇候二人伺公至即扶以入因掖其拜
起數屏左右問事常聽用三年又求外鎮乃以公知貝
州兼本州兵馬都總管將行矣召見又將付以政固辭

謝久之乃已而更以公為本鎮至五月公疾作詔使公
子洵美將太醫往視而魏潞二鎮之人亦皆奔走來問
為公請禱已而公疾革真宗又使公弟之子成美馳
驛召公歸京師而公以八月壬寅不起矣享年六十五
真宗為之震悼罷朝詔贈侍中錄其子孫賻賜皆加等
公前夫人丁氏某郡君後夫人沈氏某郡夫人子男
二人洵美終西京作坊使英州刺史之美終內殿承制
閤門祇候孫十六人其十四人皆已卒而慶宗今為右

班殿直慶崇今為文思院知恩州公少忼慨以武力智謀自喜又能好書賓友儒者所與善必一時豪傑有集二十卷其文長於議論自始仕以至登用遇事審審未嘗有所顧憚王冀公丁晉公用事每廷議得其不直輒面詆之真宗初或甚忤然終以此知公而天下至今稱其正直銘曰在浚西南誰封誰樹有宋正惠馬公之墓公當太宗真宗之時暨暨諤諤謀行計施以羸擊強以少捕衆以賤抗貴維公之勇雖貴雖衆雖強

必克維公之敏亦維公直帝曰直哉汝子良弼見國而
已不知家室內朝十年典掌機密暨予一心綱紀庶物
元功宗謀莫汝敢匹公曰孤臣敢曠于榮讒說不用是
維帝明士或困窮莫知其有既榮以位正或見醜公於
可願兩得其尤不訖大耄天為不謀德歎於年孰云耆
老有賚後世公為壽考刻趺篆首作此銘詩陳之隧道
永矣其詒

臨川文集卷八十七

臨川文集卷八十八

宋 王安石 撰

神道碑

贈太師中書令勤威馮公神道碑

翰林侍讀學士知許州軍州事梅公神道碑

司農卿分司南京陳公神道碑

虞部郎中贈衛尉卿李公神道碑

護衛忠果功臣侍衛親軍步軍副都指揮

使威塞軍節度新州管内觀察處置等使
銀青光祿大夫檢校司空使持節新州刺
史兼御史大夫上柱國始平郡開國公食
邑二千一百戶食實封二百戶累贈太師
中書令兼尚書令追封魯國公謚勤威馮
公神道碑

馮氏有家於滑州之白馬者莫知其始所以徙至曾
公而嘗以公開國於始平日其本出於漢杜陵楚相

唐之後也公諱守信字中孚自為兒童狀貌凝然慷慨有大意人固已奇之矣既冠從其鄉人受學以三禮舉於鄉會太平興國初取兵民間公出應選有司以公儒者欲免之公曰吾以子弟免而父兄任其勞此儒者所不為遂行以才武給宿衛太宗征河東公奮身冒兵數取俘馘以獻于行在太宗壯而勞之以功數遷至弓箭直副指揮使真宗兩駕河北皆命公帥其所領先驅以禦契丹公所斬虜最諸將

遷天武軍都指揮使封州刺史充御前忠佐馬步軍都軍頭公雖在軍旅數以孝經論語為人講說人尚以儒者目之至是真宗召問出孝經使講公講天子一章因言自天子至於士不可以無學學不必博孝經論語皆聖人以誨學者言行之要臣愚不足以盡識然所以事陛下不敢一日而忘此真宗嗟嘆者久之由封州數遷至捧日四廂都指揮使英州防禦使知瀛州兼高陽關都部署由瀛州召還領步

軍司公事當是時河決滑州天子以為憂問誰可使者公自言少長河上能知河利害詔以公為侍衛親軍步軍副都指揮使容州觀察使知滑州兼修河都部署河怒動埽埽且陷公坐其上指畫自若也遂號其部人以一日塞之天子賜手書獎諭召還領步軍如初已而遷威塞軍節度使是歲天禧五年也公年六十六以八月二日薨于位天子悼慟為之罷朝二日贈太尉賜錢三百萬勅宣慶使蔣州團練使

韓守英禮部郎中直集賢院石中立給護其喪事遂
以其年九月二十四日葬開封之祥符縣黃溝鄉大
里之原公曾祖諱倫祖諱筠皆不仕考諱蘊贈官至
左屯衛大將軍先夫人劉氏玉城縣君後夫人張氏
清河郡夫人子男十三人於是文懿左侍禁文吉文
握文德文慶文顯文質文貴文銳並右班殿直文燦
文俊並右侍禁文郁文雅皆已卒公孝謹忠篤遇人
有恩祖母夫人疾病公不釋帶以侍輒數月常患世

醫不足賴以為養力學方藥遂通其術公弟常欲
上其子為公子以取高蔭公對之慨然曰吾自行
伍蒙主上拔擢至此欲棄軀以報久矣顧未有所
奈何欺之是歲并公子無所蔭曰以明吾心於弟非
有愛也韋城董方廉直為公所友其卒有二女無以
嫁公為選士辦裝嫁之如已子公將兵治民寬簡有
法故人人畏愛之而無敢犯所居有迹賢士大夫多
稱之者公薨之三十二年而以其子故累贈至中書

令兼尚書令追封魯國公又二年始請謚於天子而天子賜之謚曰勤威又五年文顯為西京左藏庫副使提點開封府界諸縣鎮公事始作碑以表公墓而以銘來請予問誅於太常問書於太史問諸故老以考公子之所告而得公之所為如此於是為銘曰

允文真宗俊藝在工相協予武有來馮公馮公碩碩奮節金草有聲中邦外動夷狄自公在野手不去經率其

所學以撫戎兵公之所撫貔貅虎指麾進退安若
兒女武室以魏文罷於京維時馮公兩取其優孰施
其文有壤千里孰致其武宿衛天子帝咨馮公爾往
視河河決已塞滑人來歌帝聞而嘉勞以手勅公拜
稽首匪臣之力帝曰來爾予釐爾勤授之旄節留掌我
軍方朝告薨有詔罷視弔贈賻葬哀榮終始追拜為
令尚書中書賜爵國公昨以魯墟士生顯榮沒則多已
維時馮公至今受祉在周方虎咸有褒詩至漢充國

雄為之辭誰能詩公流示無止刻碑墓門公實有子

翰林侍讀學士知許州軍州事梅公神道

碑

宋翰林侍讀學士正奉大夫行給事中知許州軍州
事兼管內堤堰橋道勸農事上柱國南昌郡開國公
食邑二千三百戶食實封六百戶賜紫金魚袋梅公
之墓在宣州宣城縣長安鄉西山里公有五子鼎臣
德臣寶臣輔臣清臣清臣今獨在為尚書司門郎中

以公行狀及樂安歐陽公之銘來請文以刻墓碑時
熙寧元年八月四日也銘曰

公先梅伯後氏其國彌周涉秦不見史策有銷有福
著漢名籍公福之孫詢字昌言三世弗仕陵陽之里
公第廷中判官利豐再歲而擢以丞將作以宰仁和
人譽用多主推御史侍考進士一見天子以為知己
詔曰試哉遂試中書館之集賢賜服緋魚於時繼
遷兵我西鄙老弱餽守丁彊多死靈州告危帝視

不怡公請擇人使潘羅支兵法所謂以夷攻夷帝
曰誰可無如臣者曰予汝嘉閑陷奈何公拜且跪
賜言而起苟紆西師臣不愛死出書授之往訖爾
謀至疆勅還會棄靈州帝察公藝可書帝制相或止
之留佐三司其後羅支果窘西賊論將料敵皆如所
策或從或違或擠或推梧合阻夷神者公尸黜之倖
州用獄一肯去杭而蘓列國東屏漕輸淞河就付將
領三年告功僅得故省又以譴投守彼淮州有僚許

公相得於此與之欣然樂以忘徙使于湖北遷自濠
梁又奪一官往禪于襄坐發驛馬給奔喪者于鄂于
蘇剖將之符握節關中使揔其輸煌煌金章厥賜特
殊謀復靈武度兵葫蘆秦有將瑋諾公與俱會瑋召
還公復淪胥有反咸陽能名氏朱始雖弗察後捕而
誅自懷祖池再副戎車真宗新陟罪垢皆滌為郎
度支以將廣德外更四州楚壽陝荆乃還待制中糾
獄刑有歸龍圖其唐殖殖就以學士專其閣直輟之

銓衡乘傳臨并超遷郎秩進直樞密趣歸封駁考國中失申命選事得權進絀加職侍讀改司群牧移之審官審是在服伐閱積遷給事于中告疾出許鼓歌從容方公少壯志立人上談辭慨然帝悅而嚮及後晚出皆為將相公則老矣將歸田里康定辛巳六月十日公七十八以其官卒公開南昌勳爵第一夫人曰劉不及郡封封君彭城其卒先公公卒明年季秋挾日于州山西卜祔而吉公有四子伯為進士丞

于殿中與仲前死仲賜科名叔也皆丞將作殿中或
廢或興有顯惟季時丞衛尉今為郎中論序初終實
來求詩刻示無窮

司農卿分司南京陳公神道碑

司農卿分司南京陳公既以嘉祐七年九月某甲子
葬開封府之祥符縣西韓村皇考魏公之塋至十二
月公子世範等乃來求銘以作公碑蓋公昆弟皆從
先人游而某又嘗得識公父子故為序其實而繫以

銘序曰

公諱某字良器以贈太師尚書令兼中書令衛國公
諱嵩者為曾祖以贈太師尚書令兼中書令燕國公
諱光嗣者為祖而尚書左丞集賢院學士諱恕之子
也左丞當真宗時參知政事後以其子岐公之貴
而贈至太師尚書令兼中書令魏國公公岐公之弟
也而於魏公為少子年六十八以嘉祐七年六月得
疾分司而以乙巳棄世于陳州階至朝散大夫勲至

上柱國爵至潁川郡開國子食邑至六百戶賜紫金

魚袋官終於司農卿而所更者祕書省正字太常寺

太祝大理評事光祿大理寺丞太子中舍殿中丞國

子博士尚書虞部比部駕部員外郎郎中司農光祿

少卿少府監任終於知陳州而所歷者監楚州衡州

酒稅知衡州江山縣知南恩州通判江揚洪廬潭州

知衡州監江寧府糧料院知興化軍知均州判登聞

鼓院知曹州判殿中省知郢州鄭州其通判揚州廬

州皆有所避不赴知郢州則未赴而徙凡仕四十三年蓋其行事可記者衆矣而公子所能記者在江州人大饑且疫公為具饘粥醫藥不足則取廬山諸佛寺餘財以續之所活以萬數有盜刈人之禾而傷其主者當死公曰古之荒政所以恤人者盡矣然尚緩刑況今哉即奏貸其死洪州大水城之不滅者十五水得城實以入舉城惶擾不知所為公豫具薪藁不終日以塞州人德之曰無陳公吾屬如何矣衡州之

南山廣袤百餘里與夷接境大木蒙密中國人逋逃
其中冒稱夷人數出寇常寧諸邑其酋有挾左道者
人傳以為能致風雨官軍尤憚之公誘以恩信則率
衆數百來自占已而與其甥亡去又將為寇州人皆
恐公設方略以一日捕得殺之天子賜詔書獎諭
公因圖上山川形勢攻取之策以為賊今不除黨附
日衆夷人謂中國無能為必出助之可須農隙發干
人使操斧斤隨以強弩斬木除道則賊失所恃不攻

而自窮又出其材可以佐經用奏未報轉運使害其
事劾公擅擊斷不聽用佐吏又嘗稱病不自祭炎帝
公坐此罷州人乞留不得而賊果侵尋不制朝廷出
使發兵擊之數年然後定興化多進士就鄉舉者常
八九百人而學舍弊小無文籍公至則新而大之為
之購書而國子之所有者皆具均州漢上舟子數溺
商旅取貨財而以險為解公捕案寘法因取近灘數
家除其徭使表水險涉者因此得不死曹州多盜亡

命之尤凶强者七十餘人公集重購得之幾盡又修律令五家為保之法故盜往往逃去之它境蓋公施於政者能如此公嘗為書十二篇上之曰國政要事其說多聽用而中書欲遷職事以獎之公乃自言外祖王氏葬揚州無主後願除淮南所當得之一官以往視其丘墓而已岐公之葬也天子自曹州召公歸襄事特詔許公升殿公謝岐公遭遇始終恩禮之厚因乞御篆岐公之碑首上為動容賜其首曰褒忠

之碑而公終無一言自及既分司無田園僦官屋以居自為棺歛葬埋之制趣於儉而已少長好書以至於老於篆籀尤善有集二十卷其文能世其家者也夫人馮氏江南李氏時宰相延巳之孫子男五人世範前商州洛南縣尉世安前廣州新會縣令世修大理寺丞世永將作監主簿世奕太常寺太祝女四人長適大理評事柳安期次適右班殿直王允懿次尚幼也陳氏漢太丘長諱寔之後故其望在潁川而世

居洪州之南昌縣當唐末五代之亂無仕者魏公布
衣起閭巷明敏諒直稱天下仍父子執國柄而至岐
公尤盛公於仕嘗齟齬然尚至九卿以榮祿自終蓋
太丘之仁隱阨於一時而紀謚群泰貴顯者數世豈
魏公之先遭世不治亦有潛德晦行如太丘者乎不
然何其後世之興如此是故不可以無銘也銘曰

虞賓夏商其後為陳屢絕復封以承聖人至漢太丘
棄時就德詒祿魏晉子孫世食既又困窮乃生魏公

魏公之出魁名碩實有公有卿饋祀其室公則盛矣
天子所思繩繩維卿亦顯于時治官牧民入出具宜
胡公之虛太丘之里兩有州國紹榮本始歸葬浚郊
皇考在前峙此銘詩為告新阡

虞部郎中贈衛尉卿李公神道碑

嘉祐八年六月某甲子制曰朕初即位大賚羣臣陞
朝者及其父母具官某父具官某率德蹈義不躬榮
祿能教厥子並為才臣加賜名命序諸卿位所以勸

天下之為人父者豈特以慰孝子之心哉可特贈衛尉卿翌日某甲子中書下其書告第又副其書賜寬等以待墓焚寬等受書焚其副墓上乃換次衛尉官世行治始卒來請曰先人賴天子慶施賜之官三品矣而墓碑未刻惟德善可以有辭于後世者夫子實聞知某曰然衛尉公墓隧宜得銘久矣於是為序而銘焉序曰

公姓李氏故隴西人七世祖諱某始遷于光山五世

祖諱某以其郡人王閏從之始為建安人曾祖諱某
皆不仕考諱某嘗仕江南李氏稍顯矣江南國除又
舉進士中等以殿中丞致仕有學行名能知人贈其
父大理評事而已亦以子貴贈至吏部尚書遊豫章
樂其湖山曰吾必終於此於是又始為豫章人尚書
之子伯曰虛已官至尚書工部侍郎以才能聞天下
其季則公也公諱某字公濟少篤學讀書兼晝夜不
息一以進士舉不中即以兄蔭為郊社齋郎再選福

州閩清洪州靖安縣尉有能名遷饒州餘干縣令至
於毀淫祠取其材以為孔子廟率縣人之秀者興于
學豪宗大姓斂手不敢犯法州將部使者奏乞與京
官移之劇縣不報而坐不覺獄卒殺人以免當是時
侍郎方以分司就第公曰吾兄老矣我得朝夕從之
游以灑掃先人廬冢尚何求而仕遂止不復言仕侍
郎之卒也天子以公試祕書省校書郎知江州德
安縣事辭不就後嘗一至京師大臣交口勸說欲官

之終以其不可強也而晏元獻公為公請乃除太子洗馬致仕初尚書未老棄其官以歸至侍郎及公之退也亦皆未老自尚書至公再世皆有子而皆以嚴治其家如吏治江西士大夫慕其世德稱其家法蓋近世士多外自藩飾為聲名而內實罕能治其家及老往往顧利冒恥不知休息公獨父子兄弟能如此嗚呼其可謂賢於人也已公事親孝比遭大喪廬墓六年然後已事兄與其寡姊衣食藥物必躬親之及

公老矣二子就養如公之為子弟也寬嘗為江浙等
路提點鑄錢坑冶又嘗提點江南西路刑獄定亦再
為洪州官不去左右者十二年皆以才能為世聞人
以恩遷公官至尚書虞部郎中階至朝奉郎勳至護
軍以嘉祐四年七月某甲子卒於豫章之第室年八
十九夫人長壽縣君趙氏先公卒八年既葬矣五年
某月某甲子以公葬於夫人之墓左曰雷同在新建
縣之桃花鄉新里夫人故衢州人某官湘之女湘有

文行尚書與為友故為公娶其女子三人寬定寔寔
守祕書省正字早世於公之葬也寬為尚書司勳員
外郎定為尚書庫部員外郎女子二人已嫁孫二十
有一人曾孫十有五人皆率公教無違者公既葬而
二子以恩贈公衛尉卿云銘曰

李世大家隴西其先於唐之季再世光山移遷于閩
嶺海之間乃生尚書節行有偉始來江南考室章水
繩繩二子隱顯兼榮孰多後祿其季維卿幼壯躬孝

唯君之踐能不盡用止於一縣退以德義釐身於家
外內肅雖人不疵嗟亦有二子維天子使父曰往矣
致而臣身子曰歸哉以寧吾親以率其婦左右恂恂
以官就侍天子之仁既具祉福考終大耄追榮于幽
乃賜卿號伐石西山作為螭龜營之墓上勒此銘詩

臨川文集卷八十八

臨川文集卷八十九

宋 王安石 撰

神道碑

廣西轉運使孫君墓碑

贈左屯衛大將軍李公神道碑銘

淮南江淞荆湖南北等路制置兼都大發運

副使贈尚書工部侍郎蕭公神道碑

尚書工部侍郎樞密直學士狄公神道碑

尚書屯田員外郎贈刑部尚書李公神道碑
贈禮部尚書安惠周公神道碑

廣西轉運使孫君墓碑

君少學問勤苦寄食浮屠山中步行借書數百里升樓誦之而去其階蓋數年而具衆經後遂博極天下之書屬文操筆布紙謂為方思而數百千言已就以天聖五年同學究出身補滁州來安縣主簿洪州右司理再舉進士甲科遷大理寺丞知常州晉陵縣移

知潯州潯當是時人未趣學乃改作廟學召吏民子弟之秀者親為據案講說誘勸以文藝居未幾旁州士皆來學學者由此遂多以選通判耀州兵士有訟財而不直者安撫使以為直君爭之不得乃奏決於大理大理以君所爭為是而用君議編於勅慶厯二年擢為監察御史裏行於是彈奏狄武襄公不當沮敗劉滄永洛城事又因日食言陰盛以後宮為戒仁宗大獵于城南衛士不及整而歸以夜明日將復

出有難隕于殿中君奏疏即是夜有詔止獵蠻唐和
寇湖南以君安撫奏事有所不合因自劾乃知復州
又通判金州知漢陽軍吉州稍遷至尚書都官員外
郎提點江南西路刑獄有言常平歲凶當稍貴其粟
以利糴本者詔從之君言此非常平本意也詔又從
之儂智高反君即出兵二千於嶺以助英韶會除廣
西轉運使馳至所部而智高方煽天子出大臣部
諸將兵數萬擊之君驅散亡殘敗之吏民轉芻米於

惶擾卒急之間又以餘力督守吏治城塹修器械屬
州多完而師飽以有功君勞居多以勞遷尚書司封
員外郎初君請斬大將之北者發騎軍以討賊及後
賊所以破滅皆如君計策軍罷而人重困方恃君綏
撫君乘險阻冒瘴毒經理出入啓居無時以皇祐三
年三月初七日卒于治所年五十四官至尚書工部
郎中散官至朝奉郎勳至上騎都尉君所為州整齊
其大體濶略其細故與賓客談說弦歌飲酒往往終

日而能聽用佐屬盡其力事以不廢在御史言事計
曲直利害如何不顧望大臣以此無助所為文自少
及終以類集之至百卷天德地業人事之治掇拾貫
穿無所不言而詩為多君諱抗字和叔姓孫氏得姓
於衛得望於富春其在黟縣自君之高祖棄廣陵以
避孫儒之亂而至君曾大父諱師睦善治生以致富
歲饑賤出米穀以斗升付糴者得驩心於鄉里大父
諱旦始盡棄其產而能招士以教子父諱遂良當終

時君始十餘歲後以君故贈尚書職方員外郎君初
娶張氏又娶吳氏又娶舒氏封太康縣君五男子適
邈迪适邁適嘗從予遊年十四論議著書足以驚人
終永州軍事推官邈今潞州上黨縣令亦好學能文
狀君行以求銘者邈也君之卒也天子以适試祕
書省校書郎二女子一嫁太廟齋郎李簡夫一嫁進
士鄭安平君以其卒之年十二月二十五日葬黟縣
懷遠鄉上林村歆之為州在山嶺澗谷崎嶇之中自

去五代之亂百年名士大夫亦往往而出然不能多也黥尤僻陋中州能人賢士之所罕至君孤童子徒步官學終以就立為朝廷顯用論次終始作為銘詩豈特以顯孫氏而慰其子孫乃亦以詒其鄉里銘曰在仁宗世蠻跳不制餽師牧民實有膚使踐艱乘危條變畫奇療毒既除膏熨以治方遷既隕哀暨山夷維此膚使文優以仕祿則不殖其書滿笥書藏于家銘在墓前以告黥人孫氏之阡

故贈左屯衛大將軍李公神道碑銘

并序

宋故贈左屯衛大將軍李公墓在河中府河東縣陶
邑鄉仙觀里紫金山北初咸平二年公以東班殿侍
隨彰國軍節度使康保裔部軍于高陽關契丹內侵
真宗狩于魏大將恃城千里閉逃保裔以其屬出公
提少卒所戰輒破敵搏我疾孤堅弗支舉軍陷焉乃
以義死當是時十二月五日也公年四十六有詔賻
恤錄公子樞以為西班殿侍蓋六十九年而樞以行

治勞烈積官至皇城使賀州團練使而嘗一再辭賞以求追榮其父母天子亦數推恩以及朝士大夫之親而公九贈官自太子左清道率府副率至左監門衛大將軍逮今上即位則再至三品而公夫人朱氏亦封錢塘仙遊永安縣太君太君有美志純行年六十三以天聖七年六月六日卒於其子之官舍而以嘉祐六年十一月十一日與公合葬公幼而愿恭長而敏武涉書喜謀將有以為而卒不克蓋知者

傷焉唯忠壯不屈以詒祿于其後世而團練君實能
力承以大厥家噫其可銘也哉李氏世家鄭之原武
公諱興字仲舉曾祖諱顥祖諱光父諱元超皆弗仕
公生一男二女二女皆早死孫六人其二人早死榮
今為尚書都官郎中餘皆以父廕仕昌齡終三班差
使榮今為右班殿直榮今為左班殿直銘曰

李姓之始聘周隱史厥家鄭邦代晦其光公奮自田
啓蹟班行匪熊匪羆彼萬其旅帝徂伐之孰致予武

操戈以先所遇斃逃曰敵可盡其來滔滔終沉于戎
唯義之濟閔有傳祿追榮以暨誰無孫子錫命在幽
我以吾功克稱無羞詒詩後觀有石道周

故淮南江淝荆湖南北等路制置茶鹽礬
酒稅兼都大發運副使贈尚書工部侍
郎蕭公神道碑

蕭氏故長沙人也去馬氏亂遷江南又為廬陵人公
曾祖諱霽仕李氏終洪州武寧縣令祖諱煥考諱良

輔皆不仕公諱定基字守一用天禧三年進士補岳
州軍事推官以母夫人陳氏喪罷後除虔州觀察推
官人饑說州將以便宜糶倉米秋糶償之所捄活甚
多監納潭州茶米舉者十八人遷大理寺丞知臨江
軍新喻縣移監成都府市買務蜀引二江溉諸縣田
多有約李順為亂時成都大豪樊氏盜約改一晝
夜為六由此他縣歲賂樊氏縣乃得其餘水訟二十
年不決轉運使以屬公公曰約所以為均即不均約

不可恃也乃親決水視一晝夜而樊氏縣水有餘樊氏即伏罪諸縣得水如故約轉運使以為能舉知黎州州近蠻出善馬異時勢人多以託守公一拒絕蠻大喜於是累遷至太常博士以博士召兼監察御史裏行成都王駿請鑄小鐵錢為大錢當十鑄十得三是廢十得三十也公疏以為不便而駿議詘中貴人妄告兩浙轉運使罪以公往治直之蘄州王蒙正恃勢賂橫猾誣屬縣長罪死又以公往治告隨吏曰蒙

正賂汝受之以告我蒙正果賂吏直三百萬公因以
正其獄仁宗欲官公一子公乃以讓其隨吏除開
封府判官於是自監察再遷至侍御史除江西水陸
計度轉運使奏事稱上意賜三品服三司稅賦鵬
鷺羽民入一尺費餘百錢奏以鵝鸛代之宜州蠻為
寇乃移廣西兼安撫公馳至問所以反曰吾知之矣
乃蒐諸州澄海忠敢士萬人守要害戒諸將賊至乃
擊歸則已蠻不復動明年邕州甲洞與永平寨將秦

珏爭銀冶殺珏反邊大擾公曰蠻何敢是必珏有以致之問之果然乃廢銀冶誅道賊熟戶數十人又移交州討殺珏者而邊遂定仁宗曰邊吏好生事蕭某如此可召用三司度支判官王琪使江淮漕議鹽酒事請公俱往乃除三司鹽鐵判官與琪俱使江淮漕議鹽酒事至吉州除江淮漕荆湖制置發運副使以官卒于家享年五十四實慶曆二年五月十四日以其年九月二十日葬廬陵儒行鄉故舍之原公寬

厚寡欲內行孝友稱於鄉里尤知為吏在所皆有聲
績夫人河陽縣君毛氏五男子汝礪汝諧汝器汝士
汝奭皆進士汝礪終太常博士汝器終殿中丞汝諧
今為尚書屯田員外郎汝士今為永州祁陽縣令故
累贈至尚書工部侍郎而墓碑未刻汝諧請曰先人
於王氏有故子銘士大夫多矣某曰然是宜以屬我
乃銘曰

蕭氏食鄼漢功之冠卒成齊梁以戾于唐人不絕史

與唐終始厥遷廬陵來自長沙使乎御史于宋初家
折獄禦戎有聲無譁祿則世繼而年不遐揚詩墓石
以相哀嗟

尚書工部侍郎樞密直學士狄公神道碑
狄氏故并人唐武后時有以諒直至宰相者有功中
宗以及社稷是為梁公公梁公之十四世孫也諱棐
字輔之曾祖曰崇謙連州桂陽縣令祖曰文蔚全州
清湘縣令考曰希顏徐州錄事參軍及公貴贈錄事

君至兵部尚書而公母李氏封隴西郡太君蓋梁公
之後有兼謬者亦有名蹟至大官其後祿仕不終然
寢微弗顯及公乃以行能為時用出使入侍終尚書
工部侍郎直樞密為學士天下稱為善人長者公少
孤力學中咸平三年進士甲科其官自大理評事歷
大理寺丞殿中丞太常博士尚書屯田都官職方員
外郎祠部刑部郎中太常少卿右諫議大夫給事中
其職自直昭文館歷龍圖閣直學士其初任知袁州

分宜縣後嘗知開封府司錄通判鄧州成都府為開
封府判官使京西成都府路轉運又使制置江淮荆
淝再判吏部流內銓知審官院知壁廣滑魏隨陝鄭
同揚九州河中河南二府其知陝州河中府以趙元
昊反擇西方守吏其知隨州則坐在魏時軍事有驕
不遜者不即治其知揚州則不及赴而卒于京師慶
歷三年二月十七日也享年六十七公醇厚篤實未
嘗妄言笑雖有喜愠未嘗見色終身不言人過惡罷

南海所齎無南物在陝中貴人有力者言將援公於上公為不間接以它語退而歎曰吾束髮至此得爵祿皆以義可以老而自污邪蓋其廉如此其治民出於寬仁不忍雖以此嘗得罪然自若弗悔也當時士大夫聞其死多歎惜累階至中散大夫勳至上柱國爵至山陽郡開國公食邑二千一百戶食實封四百戶夫人武城縣君路氏左司諫知制誥振之女初公以布衣見路公路公即譽公文學行治妻以其子生

六男子導道導度導禮導慤導路導彛導度當天聖

初善為古文志義甚高嘗為襄州襄陽縣主簿不幸

早死君子莫不傷之導路為太常寺奉禮郎與導道

導慤導彛亦皆早死導禮今為尚書虞部員外郎六

女子嫁衛尉卿王罕衛尉卿魏琰樞密直學士何中

立尚書駕部郎中王信民二人早死狄氏當五代之

亂占潭之湘潭至公始葬武城君於許州陽翟縣張

澗里故以公合葬葬以慶歷五年既葬二十年而導

禮來求銘文刻之墓碑銘曰

維狄先公開號於梁扶國舉帝仁柔義剛施垂子孫
祿不曠仕歷世十四公為循吏內行振振恕以與人
無恚無忌考終厥身陽翟古墟有幽新里銘詩不磨
彼石之視

尚書屯田員外郎贈刑部尚書李公神道

碑

朝奉郎尚書屯田員外郎通判杭州軍州兼管內勸

農事上輕車都尉賜緋魚袋贈刑部尚書李公諱陟
字元昇少以進士舉太學衆推才高不妄交游獨與
故相張文節公友善淳化中用甲科補河南府澠池
縣尉羣盜阻穀以略行人朝廷出中貴人傳捕公率
其屬捕殺之盡以故為轉運使所奏留再任方賞遭
父喪去而契丹犯河北卒亡命相聚為寇所居內黃
大擾令尉初不自保公為設方略擒滅縣賴以無事
改除貝州司理參軍州將邊公肅知公能有難輒以

缺

公逐劇賊用一日馳百里悉縛取以歸於是州及
轉運使為論功驛召見除大理寺丞知漢州什邡縣
改殿中丞知秀州嘉興縣真宗東封改太常博士
通判通利軍又以祀汾陰改尚書屯田員外郎河決
奪一官監真州鹽倉杭州言浙江隄壞不可治詔江
淮荆浙發運使舉可用者以公通判杭州隄成度用
財力甚省而完且可久乃復得故官留再任當是時
呂文靖公提點刑獄尤知公極論薦以為材且召除

御史矣會母夫人死公行內脩事母尤以孝聞所收
恤親屬多貧不能北歸留治喪南京哀戚毀甚未及
服除而卒年五十三天禧三年六月八日也留守王
沂公賻助之乃能具棺殯凡五娶賈氏高氏張氏耿
氏最後邊氏封太康縣君今皆贈郡太君邊氏則貝
州邊公女也邊公彊明少所可知公而好之故女以
其子太康有賢行蓋見於國史公二男四女男曰中
庸守大理寺丞致仕曰中師給事中天章閣待制西

京留守女嫁太子中舍聶復貝州漳南縣令葛初平
尚書比部員外郎張參其一早死公初以文藝自進
然喜吏事所至強果辨治終以愛利為人所思嘉祐
七年十一月二十三日葬于衛州新鄉縣貴德鄉戒
海里至熙寧元年十月乃始作銘刻之墓碑李氏故
博平人後徙內黃曾祖諱祚弗仕祖諱守澄開封府
襄邑縣尉考諱珣殿中丞銘曰

矯矯李公升自辭科啓迹澠池終功淞河課文曰治

武奏厥多毀于大喪曾不及皤素琴未御虞殯遂歌
垂延在後寵祿有那兆衛西南彼墳陂陲追秩榮矣
哀如之何

贈禮部尚書安惠周公神道碑

公諱某字某姓周氏為人倣儻有大節敏於文學達
於政事真宗初即位以進士甲科除將作監丞通
判齊州即有能名召還為著作郎直史館提點開封
府諸縣鎮公事歷三司戶部度支判官又皆有能名

遂以右正言知制誥判吏部流內銓數進見奏事
真宗以為材其後置登聞鼓院糾察在京刑獄及考
進士以糊名謄錄之法真宗皆自選主者而輒以
屬公居糾察未幾遂以樞密直學士知開封府聽斷
明審無留事真宗滋以為材至嘗幸其府問勞賦
詩樂飲然後去以公更外事未久故不即大用而以
公知河中府又以知永興移天雄軍所至輒有聲績
數賜詔書獎諭於是真宗知公果可付以政即召

還除給事中同知樞密院事既而又以為尚書禮部
侍郎樞密副使真宗得疾幾不寤丁晉公用事逐
去寇萊公而以公為黨亦逐去之以尚書戶部侍郎
知青州既而又以為太常少卿知光州仁宗即位
稍遷祕書監知杭揚二州晉公得罪去還公禮部侍
郎留守南京召見之將復用公病矣乃請知潁州自
潁徙陳自陳徙汝至汝若干年以某年某月某甲子
卒春秋五十九訃聞天子為震悼贈禮部尚書賻賜

錄其子孫加等謚曰安惠初公奮白衣數年遂知制
誥特為真宗所禮禁中事大臣所不得聞者往往
為公道之公亦慷慨為上言事無所撓而其言祕世
莫得盡聞東封還公卿大夫皆獻文章頌功德公獨
上書進戒及在樞密進止侃侃不以丁晉公方盛為
之訕節故為所逐公好收挽後進士得一善汲汲如
世之夸者為已進取未嘗問家人生產好讀書善為
文有文集二十卷獨奏事諸草則公既焚之矣無在

者愛其弟越甚篤與越皆以能書為世所稱每書輒
為人取去積階至金紫光祿大夫勲至上柱國爵至
汝南郡開國公食邑至四千一百戶食實封至九百
戶嘗為東京留守判官東封考制度副使亦皆
真宗所自選也周氏世為淄州鄒平人公曾祖考諱
某祖考諱某皆儒者以學行知名山東考諱某仕歷
御史終尚書都官員外郎及公貴贈曾祖考某官祖
考某官考某官公夫人王氏北海郡夫人先公一年

卒於公之卒也公子延雋為大理寺丞延讓為太常寺太祝延壽為東頭供奉官閤門祗候延雋為大理評事以其年某月某甲子葬公鄭州新鄭縣平康鄉之北原而以王氏祔其後若干年公子延雋為尚書都官郎中累贈公至某官始追序公世次閤閱行治來請曰先人名位功德嘗顯矣而墓碑無刻諸孤獨延雋為後死微夫子許我則無以詒永久嗟乎公之事遠矣蓋雖公子有所不及知故所次止於如此然

觀公所以進而公之材可見視公所以逐而公之行
可知懍懍乎一世之名臣矣所次如此不為略也銘
曰


羣獻侯侯御于帝所出入百年將相文武有如周
公左右真宗自初筮仕以至謀國晦顯險夷考終
一德公去州郡無民不思公來朝廷天子所知發
論造功每成無隳誰私黨讎用國威福間上不豫乃
讒乃逐既投有罪而以公歸退施一州遂隕于腓美

矣邦士公之季子銘詩墓門載以龜趾

臨川文集卷八十九

謹案卷八十九第九頁前四行汝士今為永州祁
陽縣令刊本祁訛祈今改





總校官庶吉士臣張能照

校對官檢討臣龔大萬

謄錄監生臣樊少巨

謄錄監生臣張元輯